

23. Dezember 2008



Liebi Frou Muhmenthaler

Ganz hätzleche Dank für Eui Wiehnachtsgrüss. Ou mir wünsche Euch u allne Eune Schützlinge vo Härze schöni Feschttäg u alles Beschti zum Jahreswechsel u ganz viel Chraft u Muet, um die wichtigi Arbeit chönne z bewältige!

Ou dr Zeus wott no churz öppis säge: Hallo, liebs Pflegmami Magda. Mir geits prima - muess natürlech ou säge, dass üsi Mueter mit em Aaron un mir (vor allem natürlech mit mir!) z ganz grosse Los zoge hat. Es gloubts niemer, was die gäng für Ufmerksamkeit überchunnt, u das alles nume wäge üs Vierbeiner. Me seit, ig heig gewaltigi Fortschritt gmacht, das schläcke i natürlech gärn yne... Zwüschine müesse mir aber ou gäng chlei Gränze usteschte u das setzt de doch hin u wieder es chlyses Donnerwätter ab. So hei mir z.B. chürzlech dr Ghüdersack wo zum Usebringe bereit gsi isch, nomal ganz usenand gnoh u dr ganz Inhalt schön verteilt. D Mueter het gfunde, mir seige fertigi Chinds-Chöpf u drby hei mir ja nume welle luege, öb nid doch no öppis Bruuchbars drinne seig... Aber so e churzes Gwitter haltet nid lang a; chlei anehöckle, lieb luege u pfötle u scho isch alles Beschtens. Syt es paar Monet hei mir no die "alti Lady" vom Grosi zu üs gnoh. Es het relativ

churzfristig i z Altersheim müesse u isch ganz klar gsi, dass d Leika (ca. 12 jährig) zu üs chunnt. Sie isch e chlyni Baschterhündin, ou us em Tierheim, u ganz friedlech. Bym Spaziergang isch sie mängisch eifach e richtige Schlarpi. Auso längwylig isch es ganz sälte u wenn einisch doch, de fallt entwäger im Aaron oder mir sicher öppis y, wo mir chönnte astelle. Da mir jitz no churz use sötte, muess ig abschliesse.

Liebi Grüess ou vom Aaron u dr Leika u vom **GÖTTERVATER ZEUS**

Ganz liebi Grüess us em Bärnbiet

Christine Stalder



